

Suliffissarsiorturnut ikiorsiissutit pillugit Inatsisartut Inatsisaata allanngortinneqarnissaa pillugu siunnersuummik saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaalillutik suliffissarsiorturnut, tulluarsaqatigiinni 1-imut inissinneqarsimasut taamatullu suleriaannaasut, suliffissarsiorturnut ikiorsiissutinik pisinnaassanatik, suliffissarsiorturnut suliffik ilinniarsimanngitsunit suliffigineqarsinnaasoq itigartitsissutigippagu.
(Inatsisartunut ilaasorta Bo Martinsen, Demokraatit)

Akissuteqaat

(Isumaginninnermut, Suliffeqarnermut, Nunamut Namminermut Avatangiisinullu Naalakkersuisoq)

Siullermeerinninneq

Naalakkersuisut Inatsisartunut ilaasortamut Bo Martinsenimut, Demokraatit, siunnersuummik saqqummiussineranut qujassuteqarput.

Naalakkersuisooqatigiinnermut isumaqatigiisummi qitiusumik oqaruartuut tassaavoq, Kalaallit Nunaat tassaassasoq inuunerup nammineq ilusilernissaanut kiffaanngissuseqarneq ataatsimooqatigiinnermut akisussaaffimmik ingiaqateqassasoq. Innuttaasut sulinissamut piareersimasut tamarmik inuit ataasiakkaat pisinnaasaminnik piginnaasaminnillu inuiaqatigiinnut tapersiisariaqarput.

Suliffissarsiorturnut ikiorsiissutit pisortanit ikiorsiissutinik tigusaqarnissamut atugassarititaasut naapertuuttumik aqqissuunneqarnissaannik qulakkeerneqartunik, aningaasaqarnikkut inuiaqatigiinnullu tunngatillugu siuariartorneq atugarissaarnerlu aqqissuusseqqinnissanik pisariaqartitsippu. Taamaattumik sulinissamut piareersimasut tamarmik suliffeqarnermi ineriartortuartumi peqataanissamut kajumissaarneqassappu.

Tamatuma malitsigisaanik suliffeqarnermik aqqissuusseqqinnermi suliffissarsiorturnut ikiorsiissutit iluarsarnissaat iliuusissatut pingaartinneqarluni ilaatinneqareerpoq, sulinissap akilersinnaanissaanik qulakkeerisoq.

Inatsisartut aalajangiiffigisassaattut siunnersuummi saqqummiunneqartumi suliffissarsiorturnut sulinissamut piareersimasunut, suliffissamik innersuussutigineqartumik itigartitsisunut, pineqaatissiisarnerit atuuttut sukaterneqarnissaannik kissaateqartoqarpoq.

Tamatumunnga Naalakkersuisut ilisimatitsissutigisinnaavaat, suliffissarsiorturnut sulinissamut piareersimasunut, suliffimmik innersuunneqartumik tunngavissaqarnatik itigartitsisunut, pineqaatissiinissamut periarfissat amerlanerusut atuutilernissaat pillugu suliffissarsiorturnut ikiorsiissutinik iluarsaassinnermut maanna suliarineqartumut ilaatinneqarmata.

Tamatumunnga atatillugu suliffissarsiorturnut sulisinnaasunut suliffissamik innersuunneqartumik tunngavissaqarnatik itigartitsisunut, suliffissarsiorturnut ikiorsiissutinik appartitsinissaq imaluunniit atorunnaarsitsinissaq ilaatigut oqallisigineqarput.

Tamatuma saniatigut suliassaqarfik 31, nr. 3-mut oqaasertaliussat eqqumaffigeqquvakka, tassanimi kommunalbestyrelsi piffissami ikaarsaarfiusumi inuk ersittumik suliffeqarnermut

piareersimanngitsoq, Suliffissarsiortunut ikiorsiissutit pillugit Inatsisartut inatsisaat nr. 7, 20. juni 2022-mi kingusinnerusukkut allannguutai ilanngullugit §§ 6-13 naapertorlugit, kinguneqartitsinerusumik iliuuseqarnissaannut periarfissinneqarmata.

Tamanna tunngavigalugu Naalakkersuisut siunnersuut itigartitsissutigineqassasoq inassuteqaatigaat.